

四庫全書

史部

欽定四庫全書

史部

世宗憲皇帝諭行旗務奏議卷

一至三

詳校官左都御史<sub>臣</sub>李綬

編修<sub>臣</sub>裴謙覆勛

總校官知縣<sub>臣</sub>楊懋珩

校對官中書<sub>臣</sub>范來宗

謄錄監生<sub>臣</sub>高應龍

欽定四庫全書

史部六

世宗憲皇帝諭行旗務奏議卷一

詔令奏議類 詔令之屬

八旗都統等及順天府府尹議覆據給事中巴圖奏  
稱竊見每年開倉放米之時舖戶賈人俱紛紛買米  
積貯俟價昂時糶賣頗有礙於兵丁生計請將賈人  
買米並兵丁賣米之處槩行禁止等語查舖戶賈人  
雖買米積貯米仍在於京師且京師居住之人俱仰  
食倉內之米若將兵丁米石槩不准賣恐價值反致

金匱要略卷之八  
卷一  
昂貴將巴圖所請之處應無庸議嗣後遇青黃不接之時米價騰貴或有不肖賈人捐勒貧民重索價值亦未可知請官定米價令其糶賣至於兵丁米石若實有贏餘者聽其糶賣倘有無知兵丁不計足食盡行糶賣令該管叅領佐領驍騎校等責懲以示警戒奏入於雍正元年五月初八日奉

旨所議好照此施行

議政大臣等議覆據副將軍阿爾納奏稱察哈爾兵

丁從前既經宣力備極勤勞其現在行間之人又係  
初發兵時告願從征者今雖於軍前員缺補用但軍  
前缺少其本處員缺並不補用伊等轉將在家從未  
効力及軍前撤回之人補用為護軍校驍騎校等員  
揆諸情理似未允當請嗣後凡軍前及本處缺出俱  
令停其補授暫行委署俟察哈爾兵丁盡行撤回之  
日較其勞多而應用者奏請補授等語所奏甚是嗣  
後應令阿爾納將伊所領察哈爾官兵內効力人員

查明咨送該旗遇察哈爾地方員缺題補至於其缺不便久懸令該旗揀選現在應用之人奏請引

見暫行委署

奏入於雍正元年七月初十日奉

旨自有策妄阿喇布坦之事已經八載凡出征之在京八旗及盛京黑龍江寧古塔西安右衛等處滿洲官兵綠旗官兵內有宣力行間漢仗好人去得分內應陞者若於各本處補授恐致懸缺不敷者守是以將現在之人

揀選補授以致軍前効力官兵轉壅滯其陞遷之路著  
行文諸路將軍等於滿洲蒙古漢軍綠旗官員兵丁內  
有宣力行間漢仗好人去得分內應陞人等查明選舉  
在京者咨送該旗外省者咨送各將軍綠旗者咨送各  
該督撫提鎮嗣後遇伊等應陞缺出令該處即行題補  
至補授軍前之人不便虛懸其缺該處即行揀選人員  
奏請委署其補授之人若再陞轉此委署之人亦可得  
陞如此則軍前効力人等既獲陞遷之路即各本處才

力可用人員亦不致於壅滯矣將此交兵部著徧行八旗諸路將軍及外省將軍督撫提鎮等知悉

兵部及八旗都統等議覆據都統楊都奏稱兵丁人等惟賴錢糧米石為生每遇喜喪等事徃向富室借貸或以七兩為十兩或以二十兩為三十兩令立文契將三季米石充為利息名為借銀其實暗典兵米請將已經給銀取得米石者俱著撤出給還原人嗣後將借給銀兩以米為利之處永行禁止等語查兵



丁典米之事於康熙四十九年已行禁止茲不肖人等雖不敢直言典米然文契內多寫銀數以米為利是所借者少所償者多有損於兵丁生計應如楊都所請將以米為利借給銀兩者槩不准還嗣後倘仍有暗行放借之人或經查出或被旁人首發將該叅領佐領驍騎校領催及借銀放銀中保人等一併交部議處其所借銀兩不許償還

奏入於雍正元年八月二十日奉

旨依議

八旗都統等議覆據護軍統領汝福奏稱八旗拴養官馬者特所以預備緩急也茲有不肖人等冒領錢糧竟不拴養馬匹此等陋弊不可不除等語查八旗設立官馬之初凡一切情弊即嚴行禁止在案但為日既久致有不肖人等於倒斃馬匹不行買補照常冒領錢糧嗣後應將官馬交與各旗叅領佐領驍騎校等於各佐領下擇其兵丁之小心者著落拴養倘

有不拴馬匹冒領錢糧之人或經查獲或被旁人首  
出交部重處其不行嚴查之叅領佐領驍騎校領催  
等亦交部議處

奏入於雍正元年九月二十三日奉

旨知道了

八旗都統等議覆據副都統達塞奏稱八旗火班處  
官兵數目不均請令每旗滿洲蒙古漢軍三旗合派  
官兵百名防備等語查火班處所派官兵俱係八旗

金史四庫全書 卷一  
各自酌量派委所以有六十名七十名不等之處自  
設立火班以來凡遇救火之事並無遲悞不必多增  
名數但令八旗一例於滿洲蒙古漢軍三旗合派官  
兵七十名防備令該班大臣叅領等不時巡查倘有  
曠悞之處將官兵嚴加治罪

奏入於雍正元年九月二十六日奉

旨依議

八旗都統等議覆據副都統阿林保奏稱八旗挑取

馬甲務令揀選稍能清語射箭好者如不習清語不能射箭之人著於步軍出缺暫行挑取俟學成時再挑馬甲如該佐領下缺少滿洲於開檔滿洲戶下滿洲及家下舊人內挑取馬甲若寡婦孤子給與步軍鐵匠養贍等語查八旗挑選馬甲俱於滿洲內視其能騎射者挑取如缺少滿洲於開檔滿洲戶下滿洲家下舊人內選擇挑取至孤獨無養贍之人令其呈明雖年歲不及亦准挑取教育俟其成立嗣後應將

滿洲閒散人內其不能清語者給限三年令其學習  
有不能者不准挑取馬甲

奏入於雍正元年九月二十六日奉

旨所議是知道了

都統觀音保奏稱看得不肖兵丁稍遇窘乏即將軍  
器質當殊屬不合仰請嗣後將質當盔甲撒袋腰刀  
鳥鎗等物之處嚴行禁止臣等不時嚴查倘有仍行  
質當者將本人及開當舖之人一併嚴加治罪其該

管佐領驍騎校等亦交該部議處庶官兵皆知警懼不敢質當軍器似於武備不無裨益

奏入於雍正元年十月初二日奉

旨此奏甚是著嚴行禁止

八旗都統等議覆據內閣侍讀學士桑格奏稱官馬駝隻特為緊要差役而設所關綦重請令叅領佐領驍騎校等不時嚴查併令該部每月委官查驗等語具奏奉

旨將如何嚴查及查出如何治罪之處交臣等一併詳議  
欽此查八旗自立官馬駝隻以來都統副都統叅領  
佐領等原卽不時查驗兵部亦行查閱茲因日久未  
免稍有踈懈嗣後應令各旗及該部照依前例嚴行  
查閱如於定限八十日內不能令馬駝肥壯有誤動  
用將拴養馬駝人等與都統以下至驍騎校等官俱  
交該部照例議處

奏入於雍正元年十月初二日奉



音依議

兵部議覆據條奏內稱兵丁人等雖經禁止賭博乃有不肖之徒至每年十月間即開鬪鷄鷓鴣之場借以網利兵丁人內有溺於其戲者徃徃規避官差結附匪人典衣棄產以償負欠其貽害兵丁更甚於賭博宜行嚴禁等語查賭博等事貽害兵丁實非淺鮮今雖禁止賭博至開鬪雞鷓鴣之場其貽害為尤甚應如條奏所請嗣後將開鬪雞鷓鴣場及鬪蟋蟀之

處一併嚴行禁止倘有犯者立行緝捕交部照賭博  
例治罪其該管官員亦照管轄賭博不嚴例議處  
奏入於雍正元年十月初二日奉

旨依議

護軍統領吳理布奏稱八旗兵丁俱係

欽派王大臣等驗看射箭所以該管官員各將兵丁嚴加  
訓練而兵丁人等亦各奮力學習日有進益皆成精  
銳但諸王包衣佐領下兵丁所食錢糧較旗下兵丁

並無減少之處伊等竟不勤習射箭一應訓練之道  
日益廢弛請交該管官員勒定限期令其嚴加訓練  
庶一二年間亦皆可成精銳之兵矣

奏入於雍正元年十月初六日奉

### 旨照所奏施行

吏部議覆據值班科道奏稱八旗候選候補並丁憂  
起復官員俱由本旗印文咨部註冊選補又取三代  
履歷印結至掣籤以後又取領憑印結是選補一官

三次取結方得赴任比年以來竟有不肖旗員借端勒索夫領憑取結原為杜絕假冒頂替等弊旗下候選候補人員一經都統咨部該部即行註冊按月投供至掣籤後其應引

見之官悉經

皇上躬閱其佐貳雜職等官係九卿公同驗看無從假冒頂替則於領憑時又向該旗取結殊覺重複應免其重複取結以杜勒索之弊等語查雍正元年正月內

臣部以旗員赴選已取有都統印文並三代履歷如領憑時再取都統印文事屬重複亦恐不肖旗員借端勒索故免取印文領憑已行半載有餘但各旗尚未週知選官時仍間有取都統印文赴領者應如值班科道所請通行八旗一應旗員領憑俱不用取具都統印文止備履歷領狀親身赴領

奏入於雍正元年十月初七日奉

旨依議

兵部議覆據監察御史蔡仕舛奏稱各衙門應行會議之事令於擬定會議之前二日將原事清漢字各寫一篇送至應會議之衙門詳看至會議之日彼此商酌定議等語查九卿會議之事詹事六科十三道等官衙門甚多若將原事抄錄於二日前不能徧送至會議事件其抄送八旗者尤多嗣後凡一應會議事件令承行衙門於奉

旨之日即知會各衙門令其遣人將事抄去詳看以待會

議

奏入於雍正元年十月二十五日奉

旨甚好依議

條奏內稱伏惟

乾清門乃

皇上聽政之地理宜嚴肅每見大臣官員等任意上下往來坐立向背互相揖讓者甚多仰請嗣後除辦事奏事之王大臣值班大臣侍衛及在

內行走人員外其餘一應人員不許擅登

乾清門任意坐立再用道乃

聖駕經行之御路臣下豈得妄相行走亦應嚴加禁止再

查

午門前向有諸王乘馬行走之例今見諸王或有乘轎行走者殊屬不合仰請嗣後將

午門前乘轎行走之處嚴行禁止

奏入於雍正元年十二月初一日奉



旨這所奏甚是嚴交領侍衛內大臣侍衛班領前鋒統領  
護軍統領照依所奏遵行著總理事務王大臣等不時  
稽察有違禁者即指名叅奏

八旗都統等議覆據條奏內稱外任官及監管稅務  
人員未行到任先營立房產置買僕婢修飾衣服不  
顧利息輕重恣意借貸銀兩其專放官吏債之人揣  
其用急故行措勒既以六七百兩為千兩又取三分  
四分重利迫借給之後隨即遣人往任所坐索其人

不耐催逼又恐日久則利愈重因將正帑那移償還  
以致錢糧虧空者徃徃有之仰請嗣後將借官吏債  
及遣人到任所索債之事永行禁止等語應如所請  
凡外任及監管稅務官員除平常借貸銀兩外將以  
六七百兩為千兩勒取三分四分重利者令該旗叅  
領佐領驍騎校等不得具保倘有私行潛保之人查  
出交部治罪其遣人徃任所取私債者令地方官查  
拏解部治罪

奏入於雍正元年十二月十二日奉

旨凡外任官員平常借貸銀兩令該旗註冊如有過二千兩者奏聞或仍有潛行借貸者放銀之人首出令借者償兩倍借銀之人首出不令償還若經旁人首出將銀入官賞給旗下貧乏人等仍從重治罪餘依議

世宗憲皇帝諭行旗務奏議卷一

欽定四庫全書

世宗憲皇帝諭行旗務奏議卷二

條奏內稱凡議政大臣及九卿會議事件但傳令會集並不開明時刻以致前後繼到參差不齊諸王大臣各有職守若先到者久待後來之人不但各悞所司事務而彼此不能覲面亦難和衷集議仰請嗣後凡交會議事件令承行之部與承行之旗將齊集時刻開明傳知其在

內行走大臣及有事入奏之王大臣等不得與議務令告知將所議事件送閱倘有不合之處另定日期再行會議如別有事故亦令遣人告知其逾時後到者即不令其列名如此則按時齊集得以悉心詳議於事務大有裨益矣

奏入於雍正二年二月初二日奉

旨此奏甚是著交議政大臣九卿都統及當月旗照所請

行

禮部議覆據條奏內稱各處寺廟有婦女成羣結伴前往燒香者甚多若不將此禁止則積漸不已至有傷於風化應將婦女往寺廟燒香成羣結伴行走之處永行嚴禁等語查官員兵民有縱其妻女往寺廟燒香行走者笞四十罪坐夫男如無夫男罪坐本婦將寺廟之住持僧道及看守城門之人不行禁止者同罪再兵民人等粧扮神像鳴鑼擊鼓迎神賽會者杖一百罪坐為首之人若里長知而不首者笞四十

定例遵行在案但歷年既久地方官不能實心奉行以致愚夫愚婦不知法紀結伴燒香出入寺廟習以成風將此應再通行嚴禁仍有不遵者依律治罪

奏入於雍正二年三月十三日奉

旨依議

副都統常在奏稱各省將軍處保送放官之人但咨送其人之本身其食俸餉之年分及出兵隨圍行走得功牌得賞之處並不聲明到旗之日該旗又只據



本人言詞填寫履歷帶領引

見此保送之人或有未曾出兵隨圍効力行走而妄行欺

瞞從中希圖徼幸等弊亦未可定臣請

勅下該部行文各省將軍其應保送放官之人將其所食

俸餉之年分及出兵隨圍得功牌得賞之處俱查明

填寫咨送該旗該旗照依咨文填寫綠頭牌帶領引

見如此則從中希圖徼幸之弊可除矣

奏入於雍正二年三月二十二日奉

旨這所奏甚是著該部照依所請施行

副都統韓永傑奏稱近見八旗兵丁徃徃聚集朋侶三五成羣徃遊園館縱飲妄為無所不至再官員等乃管轄兵丁之人亦有徃遊園館嗜飲肆行者不但奢靡妄費亦且大有玷於官箴仰請

特勅八旗無論官員兵丁有進園館者或旁人出首或本旗查出係兵丁責革係官員叅劾治罪如此則人知警懼不致妄行靡費而於旗人生計大有裨益矣

奏入於雍正二年三月二十五日奉

旨著八旗都統等照依所奏實心奉行不時嚴查教訓該屬人等若視為虛文苟且塞責經朕查出將該大臣等從重治罪

八旗都統等議覆據鑲黃旗漢軍都統觀音保奏稱八旗官兵看守倉庫與外藩進貢人之馬匹其官員係值班之旗派出其兵丁係滿洲蒙古漢軍三旗合派常有不肖兵丁以派出官員既非本旗之人不能

辨伊面貌徃徃倩人冒名代徃殊屬不合嗣後凡驍騎兵丁看守之處派某旗之官員即派某旗之兵丁則可免冒名代徃之弊等語查八旗官兵看守倉庫與外藩進貢人之馬匹俱係滿洲蒙古漢軍三旗酌其多寡公同均派所派官員於接班時查明兵丁名目一應冒名等弊俱係伊之責成兵部大臣官員及步軍統領總尉都統副都統叅領等不時稽查若派某旗之官員即派某旗之兵丁各旗佐領多寡不等

恐其不均將觀音保條奏之處應無庸議至看守之處或有不肖匪類強索該班兵丁之錢財伊身代為看守所謂坐地虎者著該班官員即行告知該旗都統等送部從重治罪

奏入於雍正二年四月初一日奉

旨所議是既將坐地虎之處具奏大臣等若不能各行嚴禁除此惡習斷然不可亦不得推諉值班大臣即非本班若遇閒暇亦當各查該管人等朕亦乘爾等不備遣

金史卷之八十一  
卷二  
人往查若經查出將值班大臣及該旗大臣一併議處  
其加意以整飭之

八旗都統等議覆據副都統馬奇達奏稱八旗世襲  
官員佐領有因其子幼小及無嗣者其職給與族人  
承襲本家之寡婦至有貧乏不能聊生者請將襲職  
族人之俸稍行分給庶寡婦得以養贍俟伊幼子長  
成挑取護軍馬甲時其俸銀仍著退給本人等語查  
凡襲職年幼之員原有食半俸半米之例先經康熙

六十年八月戶部請將諸王以及官員等應領秋季俸銀照例具奏奉

旨今值動用錢糧之際即如莊親王貝勒盧克都等並不行走此等人之俸銀應行停止再王以下官員以上有不行走者俱著查明停其俸銀止給米石前因三逆之事多費帑項亦有停止俸銀之處將此著交該部查明具奏有應給者再行給與欽此該部查明一切應食半俸之人俱行停止只給米石一半後因三逆之事告捷仍復照前

賞給今賴

皇上德威遠被策妄阿喇布坦已經恭順羅卜藏丹津已  
經殄滅各路大兵俱已撤回應照副都統馬奇達所  
奏其年幼未行上朝官員之半俸及養贍寡婦終身  
之半俸亡故官員之命婦期年之半俸請仍照常賞  
給再無嗣之世職官員其襲職與族人者原有將俸  
銀分給養贍之例茲因年久或有不肖之徒不行分  
給亦未可定嗣後如有此等襲職之人著該叅領佐



領及族長等將襲職人員之俸銀三分中分給一分  
養贍本家之寡婦其原管佐領及世襲佐領內有於  
一族中輪替承襲者甚多若將俸銀分給寡婦恐有  
無知之婦不分遠近妄起爭端殊為不便請將佐領  
之俸無庸分給

奏入於雍正二年四月初二日奉

旨即今軍務大概已有定局此議甚合朕意著仍依舊例  
賞給餘依議

條奏內稱查各佐領下所有官馬駝隻有關國用最屬重大每值出牧之時有不肖之徒欲行網利馱載各項物件多至疲瘦及到場時天氣炎熱且多蚊蟲馬駝不能肥壯者皆由於此臣請於出牧往回之時不許駝載物件夜間亦不許將馬入圈其馬駝於到京之日著兵部會同該旗都統等驗看奏

聞如此則出牧之人不致將馬駝妄行馱載其馬駝得以肥壯至京於喂養馬駝之兵丁亦有裨益矣

奏入於雍正二年四月初八日奉

旨這所奏甚屬可嘉照依施行著此次出牧之大臣等嚴行禁止

條奏內稱查八旗每佐領下前鋒護軍等俱有定數但間有一佐領內遇前鋒護軍缺出補挑之時該佐領內無可挑取之人有於該甲喇該旗內擇其騎射好者挑補即令其在挑補之佐領下當差行走其錢糧米石仍入於原佐領檔案內支領故各佐領內支

領錢糧米石檔案數目多少不一而該旗查對細數亦必多需時日恐經日久或有不肖之徒以檔案內既無一定之數致生謊開冒領之弊亦未可定臣請嗣後各佐領內支領銀米檔案將各佐領內所有前鋒護軍一定額數填寫或有於他佐領下補挑之人其應領銀米不必入於本佐領內支領即入於補挑之佐領檔案內咨部領取如此則錢糧之事得以清楚而永無謊開冒領之弊矣

奏入於雍正二年四月十一日奉

旨這所奏甚是照依施行

禮部議覆據宗人府府丞吳梁奏稱會典內載凡遇  
皇上陞殿與大慶齊集並每月常朝滿漢文武官員按翼  
排班行禮坐立前後等次甚明不可稍有違越竊見  
朝會之處大小官員並不各按行列以致班不整齊  
大失人臣恪恭之義仰請

勅下禮部嗣後凡遇朝會之處鴻臚寺官將滿漢文武官

員引入其排班行禮及坐立之處務令俱照會典所載遵行若有不按品級坐立及跪叩不齊者著派出之御史及鴻臚寺官員即指名叅劾從重治罪等語查本年正月奉有

諭旨元旦朝班左翼人員並不按班排立三五成羣前後錯雜往來此係大禮之地乃都察院所專司伊等理應拏叅著將元旦左翼站班之御史交部察議嗣後行禮排班之處於左右兩翼各派侍衛四五員令其管轄若

有如此行走之人御史即指向侍衛令其拏叅欽此載  
在檔案嗣後朝會之處若有坐立越班跪叩不齊以  
致失儀者著御史指向派出之侍衛即行拏叅交刑  
部從重治罪倘御史侍衛等稽查不嚴致有越班失  
儀之人不行糾叅者將伊等一併交部從重議處  
奏入於雍正二年四月十八日奉

旨依議

總理事務王大臣等議覆據條奏內稱八旗行咨各

部院衙門之事所關甚重凡遇緊要事件該管大臣等書銜用印委員送至該衙門當月之處其當月官止將送文官之職名記檔並不將部院收文官之職名給與倘有文書遺失訛錯之處彼此推諉抵賴反致有誤公事請將八旗行咨各部院衙門之文書亦照各部院衙門彼此給與職名之例各行登記檔案以憑查核等語查八旗凡有咨部印文接受官員俱各給與職名惟兵部以八旗係伊部統屬向來不與



職名但八旗用印行咨事件所關甚要若不彼此給與職名或經日久無憑查核應如條奏所請嗣後凡八旗行咨兵部及各部院事件令將送文官員之職名記檔其部院收文官員之職名亦令給與各登檔案倘有遺悞以憑查核自不致彼此推委抵賴於事務大有裨益矣

奏入於雍正二年六月初七日奉

旨依議

金史卷之二  
卷二  
光祿寺卿黨古立奏稱倉場米石上儲國用下給兵糧所關重大誠宜慎之又慎乃八旗滿洲蒙古漢軍兵丁於領米之時應領之佐領當日多不領完每留餘尾在倉另日再行補領致有不肖之徒乘間侵盜及重複支領等弊仰請

勅下倉場衙門各都統等交各倉監督并八旗派出之監看放米官員嗣後應行支領米石之佐領務令於一日之內將應行支領之米令其全完不得稍留餘剩

如此則兵丁等可以速得米石而乘間侵盜及重複支領之弊可除矣

奏入於雍正二年八月初五日奉

旨這所奏是著八旗都統倉場衙門加意奉行嚴行稽查八旗大臣等議覆據條奏內稱凡佐領驍騎校係管轄兵丁之員理宜教訓該佐領下兵丁令其節儉以裕生計乃有佐領驍騎校但思網利串通領催人等指稱他人名色或於該管佐領或於其弟兄所管佐

領下借放印子銀兩有十個月扣完者亦有十二個月扣完者每月關領錢糧之時勒令清償不許暫緩因而將利作本利又加利以致兵丁生計徃徃因此匱乏相應嚴行禁止交各該叅領不時稽查如有違者事覺將借給銀兩不准償還外仍將佐領驍騎校等併借銀之人俱交該部從重治罪等語查不肖之佐領驍騎校等於該佐領下借放印子銀兩每月坐扣錢糧實有礙於兵丁生計應如條奏所請嗣後除

兵丁等自相借貸不行禁止外其佐領等借放印子銀兩坐扣錢糧之處概行禁止兵丁每月關領錢糧務令佐領及驍騎校親身驗看給發並嚴飭各該叅領不時稽查如有違者或經查出或被首告將失查之叅領等一併交與該部議處

奏入於雍正二年十月初三日奉

旨照所議行著都統等實心稽查如只圖塞責何益之有徒令小人等作為笑談耳似此等禁止之處俱有關於

諸臣顏面若於理不可行之事朕並未嘗迫令諸臣議以必行且並未授意於人令其陳奏諸臣何故必如此定議耶凡應禁應行之事俱宜實心遵行諸臣縱不自顧其顏面亦應仰體朕心為朕加勉切望諸臣咸各抒誠竭力輔佐朕躬以酬

聖祖皇考多年教養之恩因奏此事之便特將朕意宣知

兵部議覆據條奏內稱近見官員人等任意帶領家人擅携坐褥進至

箭亭左近混行坐卧喧嘩至有市賣茶酒檳榔等物者  
嗣後官員等有進

內奏事者應按伊等品級武官三品以上文官四品以  
上准其帶一家人携進坐褥其餘微員家人一概不  
准帶入併將

紫禁城內市賣物件者亦請禁止等語查看守

箭亭每日派有護軍叅領一員護軍十名即著該班護  
軍叅領護軍等不時嚴加查禁倘有不肖人等仍有

潛入市賣物件者令該班叅領護軍等即行緝拏告  
知護軍統領等詢明由何門而入即將其守門叅領  
護軍校等一併交部議處又查文武大臣官員等俱  
由

午門而入侍衛及內務府官員執事人等俱由東華門  
西華門而入除文武大臣侍衛執事人等外嗣後文  
武官員四品以上者俱准帶一家人携其坐褥而入  
至內閣內務府鑾儀衛上駟院與修書各館及侍衛



筆帖式兵部理藩院該班官員等俱係每日在

內辦事夜則值宿其家人坐褥不便不令帶進官員筆帖式等俱令各帶一人携其坐褥而入至不在

內廷行走與品級不到官員等有妄行帶人携坐褥而入者或被該班護軍叅領護軍等查出或被旁人首告將其主僕一併交部議處

奏入於雍正二年十月初七日奉

旨依議

戶部議覆據副都統祁爾薩奏稱八旗開檔及為義子之人係無嗣年老殘疾滿洲既不能當差行走又未置有產業冀得錢糧故令其披甲養贍伊身近見開檔義子人等不念伊原主養育之恩每有越佐領認戶竟與原主無涉又隔數輩即為正戶相應將越佐領認戶之處一概禁止等語查八旗開檔及為義子人等越佐領認戶者甚多實屬不合應如祁爾薩所奏除現在八旗正戶滿洲並已越佐領人等不議

外嗣後開檔及為義子人等仍令在本佐領下當差  
如有越佐領認戶自稱正戶滿洲與原主無涉者該  
旗都統等即拏交該部從重治罪俟

命下之日通行八旗一體遵行

奏入於雍正二年十月十四日奉

旨依議

八旗大臣等議覆據條奏內稱佐領一官所關甚要  
自分編佐領以來有父子兄弟俱管佐領者將伊家

下人等載於兩佐領冊內凡挑取馬甲該佐領等並不從公辦理任意就中設法惟將伊等家人及其兄弟與族中之家下人等挑取其另戶之閒散滿洲及寡婦家人孤苦人丁反不能得將此交都統等將各佐領下所有家下人等當馬甲者查明具奏其應退者即行革退另於應挑人內挑取等語查挑取馬甲該佐領與驍騎校等先將另戶人等驗看擇其應得者告知叅領叅領等復加詳閱擇其尤應挑取者帶

至都統等前將情由詢明驗其人材公同挑取如果本佐領下另戶人內有應給馬甲之人而佐領驍騎校等不行舉出惟將佐領家下人及佐領之兄弟族中家下人等帶往挑取不但應得馬甲之人不肯隱默其該旗都統及本甲喇之叅領等亦斷不姑容至各佐領之丁冊俱在都統處收貯佐領等何能任意隱匿但佐領既多人亦滋衆從前大臣等不無瞻徇等弊應如條奏所請詳查另戶人內如有應挑之人

不行挑取將佐領之兄弟及其族中家下人等挑取者即行革退給與佐領內之貧苦單丁倘佐領族中果有寡婦孤子貧苦之人賴以養贍應留者仍行留養嗣後挑取馬甲令於另戶人內挑取若有未便之處仍於佐領下開檔滿洲戶下滿洲內擇其射箭好者挑取又據條奏內稱每一佐領所有領催四名佐領家人佔據一二名其族中家人又佔據一二名等語查領催係佐領驍騎校以下辦事之人應將當領

催之家下人等悉行查革開檔者照常留役嗣後如  
有領催缺出俱於另戶馬甲閒散滿洲內挑取倘其  
中無可挑取之人原有於本佐領下護軍內調取之  
例仍應遵例調取如有違者發覺之日將佐領驍騎  
校與本叅領該管大臣等一併議處

奏入奉

旨據爾等所奏如有另戶將另戶挑取馬甲如另戶滿洲  
少時將戶下滿洲挑取等語倘另戶滿洲最多之佐領

其孤寡之人不得錢糧何以為生有似此者爾等將該  
佐領下人悉行傳集曉諭與衆其如何給與孤寡人錢  
糧不令匱乏之處再行議奏再議得伏查

恩詔條款內凡旗下孤苦人丁悉行給與一兩錢糧米石  
寡婦之子幼小不可披甲者亦皆令為教養兵丁倘  
以額內馬甲又為寡婦養贍誠恐不肖之徒藉養贍  
寡婦之名將馬甲之缺恣與家奴至若家下人等當  
馬甲者多另戶滿洲當馬甲者少如遇委署護軍及



挑取護軍之處恐其不能接續嗣後馬甲缺出仍應  
於另戶及開檔人內擇其射箭好者挑取或該旗內  
果有孤貧寡婦無錢糧養贍者將其佐領下人悉行  
傳集曉諭令伊家人當馬甲外餘仍照臣等從前所  
議施行可也

奏入於雍正二年十月十七日奉

旨依議

禮部議覆據鴻臚寺卿希佛奏稱京城內外官兵百

卷二  
姓人等往往有不肖之徒遇有喪事出殯之際擺列  
諸戲諸事僭越復於出殯之前一日設辦筵席聚集  
親友竟日徹夜演戲為歡不但糜費亦且大有虧於  
孝道仰請

勅下該部嚴行禁止等語查居喪設辦筵席演戲為歡實  
屬有虧孝道應如希佛所請通行八旗都察院順天  
府衙門將出殯之時前列諸戲及前一日坐夜縱飲  
之處嚴行禁止如有違者各該管官員即行查拏治

罪倘該管官員徇庇不舉或被旁人首出或經科道  
叅奏將該管官員一併嚴加議處

奏入於雍正二年十一月初十日奉

旨依議

八旗漢軍都統等議覆據副都統岳興阿奏稱八旗  
漢軍俱係火器營兵丁其進步連環方營團營從前  
俱有圖式今新換之大臣官員兵丁若不照依圖式  
訓練必致原舊式樣悉不能知請將各旗操演之圖

金史卷一百一十五  
卷二  
八旗漢軍合操之圖及大閱之圖俱令查出詳加定議進呈

御覽之後遍行傳示八旗等語查火器營從前俱有圖式以備官兵照依訓練應如岳興阿所請著八旗漢軍都統等會同兵部將進步連環方營團營及各旗操演八旗漢軍合演與大閱之圖式詳加議定繪就式樣請

旨指示以為永遠定式如此則官員兵丁既得按圖操演

而後進之人亦易於習學矣

奏入於雍正二年十一月十二日奉

旨依議

世宗憲皇帝諭行旗務奏議卷二

欽定四庫全書

世宗憲皇帝諭行旗務奏議卷三

議政大臣等議覆據查旗御史觀音保等奏稱臣等將八旗每月送到檔案詳加校閱一應行查及補授官員事件俱與定限相符但補授官員或有一旗以檔案未經查清或有一旗以派出王大臣未經驗看雖行知會臣等其中不無踰限遲延借端推諉之處仰請嗣後八旗補授在京及外省駐防官員並補授

佐領承襲世職等事如有情由不能於限內完結者  
令該旗各將情由陳奏行知臣等登記檔案無得隱  
匿以滋弊端再八旗前鋒叅領前鋒侍衛護軍叅領  
護軍校等員缺並不知會臣等竊思前鋒叅領等缺  
俱係要職豈容久曠嗣後相應照八旗補授官員之  
例將出缺及補授之月日令前鋒統領護軍統領處  
按月查明咨送臣等照例註銷等語查八旗補授佐  
領承襲世職事件有不能於限內完結者若將展限



之處每事請

旨具奏似屬不合嗣後相應令各該旗將限內不能完結情由聲明行知查旗御史至補授京城驍騎叅領及外省駐防官員等缺並無紛擾事故應仍令其照限完結若有隱匿徇庇等情或經查出或被首告該御史即行題叅交該部嚴加察議再前鋒叅領前鋒侍衛護軍叅領護軍校等員缺出併補授之處應如所奏嗣後令前鋒統領護軍統領處明白造冊行知查

旗御史若有情由不能於限內完結令於文內一併聲明倘有隱匿徇庇等弊該御史查出即行題叅可也

奏入於雍正三年二月十四日奉

旨依議

總理戶部事務和碩怡親王允祥等奏稱據都統拉錫將該旗喇都佐領下吏部員外郎納爾布控告家人袁國棟贖身為民一案咨送到部臣等查得副都

統查思哈曾將旗下家人贖身之處條奏經九卿議覆有滿洲家奴並無開出為民之例但奉行年久狡惡家人恃有錢財背主贖身冒於旗民之間者不無其人等語九卿所議係持兩端未有一定既謂無開出為民之例又有奉行年久之語致使家主與家人彼此皆得藉口控訴不休且將家主情願令其家人贖身為民之處未曾議及不詳不備何以遵行仰請嗣後凡旗人家奴指稱別旗人買出或自行贖身冒

於旗民之間兩處俱無其名者與跟隨伊主仕宦外省私立產業鑽謀贖身者查明緣由俱令歸於本旗如果伊主念其累世効力情願令其贖身為民該旗該部俱有檔案可查州縣地方又有民冊可憑者令歸民籍不許伊主之子孫借端控告如此則互告之端可息而聽斷之下亦得定例遵行矣

奏入於雍正三年二月二十四日奉

旨此奏至公至當著依議若尋常瞻顧私情之大臣遇此

等事正可任意處之以開招權射利之端此奏甚屬可嘉九卿從前議行此事之時未必知怡親王之居心行事也

兵部議覆據條奏內稱凡文武大臣官員內有兼世職並叅領佐領者若獲罪革職或革職降級留任其世職有仍留本身者亦有一併革去者再部院官員因病告休有仍在旗下世職行走者亦有一併解退者凡議處時或應將兼職一併革退或應將本銜革

退而留其兼職其革職及降級留任者或止革其本  
銜止降其本銜於兼職世職應否准其食俸之處宜  
明白陳奏永定為例既易於遵行亦且甚為公平再  
在侍衛行走之世襲官員佐領或因懶惰規避或因  
貧乏不能在侍衛處行走或因不及經領侍衛內大  
臣叅劾革退侍衛令回本旗者若實係家計艱窘人  
不及不能在侍衛處行走者既係世職仍可令其在  
旗下行走若因懶惰規避品行不端革退侍衛者如

何可以令在原官行走領侍衛內大臣遇革退侍衛  
時將革退情由明白陳奏行知該旗該旗亦易得定  
其官之去留等語查文武大小官員內因貪污行止  
不端獲罪者定例革職無論兼佐領世職之文武官  
員俱行革黜若因有玷官箴而獲罪者併將兼佐領  
之文武職銜俱行革退其世職應否承襲本人之處  
令該旗請

旨再奉

旨革退文武官員內在武任內獲罪革退者其所兼之文職應否去留之處令部院大臣請

旨任內獲罪革退者其所兼之武職及世襲之官應否去留之處令該旗大臣請

旨若因公誣誤止革本職之罪者在文職內誣誤革其文職仍留其所兼之武職及世襲之官在武職內誣誤革其武職仍留其所兼之文職及世襲之官若不兼文職止以武職而兼世職者在職任內誣誤革其職



任之官仍留其世職再因公誥誤獲降級調用等罪者視在何任獲罪即由何任降級調用再因公誥誤革職留任者亦視其在何任獲罪即由何任停俸若所留之官其俸較多即視其多者給與文武官員因病具呈者其兼職之官及世襲官之俸著暫停止俟病好時文員赴吏部具呈候缺自補授之日給俸若兼有世職者自具呈之日給與世職之俸武員在該旗大臣處具呈在旗下當差行走自當差之日給俸

再由世職佐領挑為侍衛者若實係貧乏不能在侍  
衛行走著領侍衛內大臣明白陳奏革退侍衛令以  
原官回該旗行走若因懶惰規避品行不端叅革侍  
衛者將所兼之世職並佐領俱行革退併交該旗令  
應承管承襲之人襲替

奏入於雍正三年二月三十日奉

旨依議

八旗都統等議覆據翰林院侍讀學士覺羅逢泰奏

稱

皇上撫御海宇務期登諸上理頒賜八旗

聖諭廣訓

御製朋黨論諸書誠厚風俗正人心之極規也但八旗大

臣等宣示各該佐領恐或不能周徧竊見外省將軍  
總督巡撫以下等官每月會集講

聖諭廣訓曉諭村民八旗亦宜照依此例將

聖諭廣訓

御製朋黨論諸書令各甲喇各佐領下每月傳集官兵人等明白講解俾其曉悟等語仰惟

聖諭廣訓等書原係厚風俗正人心勸善懲惡之大經大法理宜家喻戶曉咸各講習嗣後凡所奉

訓諭令八旗各佐領下於每月初一日傳集該管官兵明白講解再教場射箭之期亦令講解曉諭於衆奏入於雍正三年四月二十三日奉

旨知道了

八旗都統等議覆據副都統金以坦奏稱查

禁門該班之八旗兵丁滿洲各五名蒙古各二名漢軍各三名俱不備軍器但聽差遣遇

皇上行幸及封印後滿洲蒙古漢軍每旗另派領催馬甲

五十名各備撒袋鳥鎗看守臣愚以為八旗大臣在

禁門輪流該班但有聽差兵丁十名似屬太少仰請嗣後各旗每日派兵五十名俱備軍器隨大臣等看守  
遇

皇上行幸及封印後每旗各添兵五十名共一百名俱備  
軍器看守等語查大臣等該班之處但有聽差兵丁  
十名又不備軍器實屬不合應如所奏於原有聽差  
兵丁十名外每旗添兵二十名俱備軍器看守各派  
叅領一員章京三員令其管轄遇

皇上行幸及封印後仍照舊例遵行再所添兵丁居住房  
屋需用錢糧不多毋庸交部每旗委官一員各動本  
旗所貯官銀量其足用添造可也

奏入於雍正三年六月初三日奉

旨依議但添設兵丁所居房屋奏內有動用各旗所貯官銀蓋造等語並無將蓋造房屋及需用銀數奏聞之語俟工竣日將房屋及用過銀數奏聞嗣後凡有動用官銀修造之處工竣之日將所修工程並用過銀數奏聞之語填寫具奏

鑲藍旗漢軍都統耿化祚奏稱八旗補授佐領承襲世職事件現今將應行補授人員職名俱行開列引

見

皇上親閱擢用惟驍騎叅領缺出該旗都統副都統等於副叅領內挑選擬定一正一陪引

見補授竊思叅領之缺最為緊要每旗所有副叅領五員俱係協同正叅領辦理事務者若止將一正一陪引見補授相沿日久恐有不肖之徒互相瞻徇請託鑽營而賢能之員反致壅滯臣請嗣後遇有叅領缺出相應不論正陪將副叅領五員按其年分一併開列職名



奏請引

見

皇上親行擢用庶人材不致遺漏而夤緣之弊亦可除矣  
奏入於雍正三年六月初六日奉

旨此奏甚善嗣後著照依遵行將此遍傳諭八旗都統知之

八旗都統等議覆據副都統董毓祥奏稱竊見八旗  
所派看守倉庫俱係職分卑微之世襲官員及驍騎

校等雜職所管兵丁易至怠忽仰請嗣後派三品以上官一員委以管轄稽察之任令其晝夜巡察庶兵丁等不致生怠忽等語查八旗看守倉庫地方俱派阿達哈哈番以下世襲官員與佐領驍騎校等官舊例凡倉庫等處令大臣叅領等時往巡察因歷年滋久漸致廢弛並不巡察嗣後倉庫等處仍照舊例令大臣等巡察再滿洲蒙古漢軍三旗每日合派叅領或副叅領一員令其於本旗看守倉庫之處不拘常

格晝夜巡察如此則看守人等自各加勉勵謹慎矣  
奏入於雍正三年六月十六日奉

旨所議好依議

吏部議覆據臣部侍郎傅敏奏稱例內凡官員加級  
有隨帶不隨帶之分遇陞遷時准其帶於新任者謂  
之隨帶級如非隨帶之級俱削去不准帶於新任此  
內外滿漢大臣官員一體遵行不容有異者也但漢  
官等削去所加一級准給紀錄一次滿洲官員無給

全史卷之三  
紀錄之例一槩削去是例款雖同而或給紀錄或不給紀錄則不同也仰請

勅下該部議令畫一等語查一應定例原宜內外臣工一體遵行滿漢官員豈容有異應如所請嗣後滿洲官員遇有陞遷將不准隨帶之級照漢官例每級改給紀錄一次可也

奏入於雍正三年六月十九日奉

旨依議

吏部議覆據都統觀音保奏稱查得漢軍外任文官如遇丁憂必遣家人告知該佐領由佐領報明該旗都統等取具印結給伊家人持回任所交納上司始行回旗因而不肖官員將所得咨文隱匿遷延不行申報者徃徃有之仰請嗣後外任旗員丁憂印結即令該旗送部轉行各該督撫等語查定例內開在外旗員丁憂取具該旗印結呈送督撫該督撫具奏令其丁憂回京於赴部驗到之日為始計算丁憂月日

倘有違限不到者照例議處但其中不肖官員將所  
取印結隱匿遷延不無行私作弊之處應如所請嗣  
後旗員丁憂仍遵照舊例據該督撫揭帖出缺其應  
給督撫司道等各印結不得給伊家人令該旗於十  
日內即行咨部由該部封發該撫催令該員回旗守  
制可也

奏入於雍正三年六月二十七日奉

旨依議

吏部議覆據都統穆賽奏稱外任官員離任回旗雖有定限但不將起程之日報知該部該旗恐不肖之員在外任意遲延不即赴京或有虧空等項以致無從著追乞交部定例令此輩不得肆行遲延等語查自外任回旗官員俱係同城官員催令起程到京俱有定限但奉行日久未免稍弛應如所請嗣後外任官員遇有陞轉降革應回本旗者視其程途遠近嚴定期限其有驛站之大路令其日行一站其無驛站

紆遠之路令其日行七十里將起程之日報知該部該旗以憑查核如有遲延留滯不即進京或身雖到京而留家屬於外者令該地方官報知督撫查叅交部照例議處

奏入於雍正三年六月二十七日奉

旨這所奏內議將應行回旗官員遇無驛站紆遠之路令其日行七十里一日行七十里未免迫促著改為五十里



八旗都統等議覆據侍郎塞德奏稱揀選可用之人  
補放族長令其教導衆人再令於每年歲底會集族  
衆宣讀

聖訓俾各曉悟等語查從前族長俱係佐領驗放徃徃不  
得其人實於教導等事無有裨益請將現在族長交  
各旗都統副都統等驗看其人去得能管束者留之  
不及者俱行革退擇其優者補放嗣後補放族長俱  
令都統副都統等於阿思哈尼哈番阿達哈哈番拜

金史卷之三  
卷三  
他喇布勒哈番拖沙喇哈番及舉人生員護軍領催  
內擇其人去得能管束者補放至

聖訓及奉行條例諸書現今各佐領俱每月宣讀嗣後交  
族長等亦每月宣讀俾各曉悟再族長等果能盡心  
將本族之人教導有成俟至三年令各都統等查明  
給與紀錄以示獎勵

奏入於雍正三年七月二十五日奉

旨爾等所議甚好依議

領侍衛內大臣前鋒統領護軍統領等議奏

紫禁城內各門一應看守之處甚屬緊要凡出入行走之大臣官員以及各執事人等雖有定例而看守之人視為泛常並不嚴加稽查致有混行出入之人今在

內行走諸王大臣官員及各執事人等仍照常令在景運門隆宗門後左門出入其後右門原係膳房茶房及應行走之執事人等出入之門亦應仍照舊例其

餘不許出入令該班大臣官員問明其不應出入者  
即行攔阻如有奏事大臣等帶領閒人行走而該班  
大臣官員等不行稽查致有混入者將帶入之大臣  
及該班之大臣章京護軍校護軍等一併治罪再

皇上躬祭

壇

廟及陞

殿之日一應執事人等俱於五鼓入內伺候夤夜之際

無憑稽查俱令各該管人等帶入其部院大臣官員  
原從後左門出入仍令侍衛等隨入其內閣兵部理  
藩院官員及兼理部務在

內行走之王大臣處回事官員等仍照舊例令在

景運門隆宗門出入左翼門右翼門昭德門貞度門此  
四門除官員執事人等行走外跟隨之家人一槩不  
許行走如有違禁擅入者將家人之主及該班之章  
京護軍校護軍等一併治罪倘看守之人怠玩不行

查問致有閒人混入者經臣等查出將該班章京護軍校護軍等各交該部從重治罪如此則看守官兵各得加意稽查不敢怠忽庶不致有混行出入之人矣

奏入於雍正三年八月十八日奉

旨依議

兵部奏稱查出牧地方按翼派出副都統者令其總轄一翼之官兵也按旗派出叅領及閒散官員者令

各管該旗甲喇之兵丁使其盡心牧放馬匹也俱係酌量派出之員若官員等遇有事故即給假令回則出牧地方當差行走與管轄兵丁必致缺員但出牧官員不可擅行令回之處從前並未有定例是以大臣官員等或看情面令回或私自潛留不去等弊徃徃有之嗣後凡出牧官員遇有切近喪事者著副都統即令伊回行文該旗補派他員前徃若值出牧將回之前一月或二十日以内免其補派再有婚嫁等

事者著叅領詳查告知副都統給假一月仍將該員  
乞假之處行文該旗視其事訖即催令前往若乞假  
官員有踰限不去者罰俸一年副都統叅領等不加  
詳覈即給假者罰俸半年再有觀望逗留及私自潛  
回者該叅領告知副都統叅奏嚴加議處

奏入於雍正三年九月初五日奉

旨依議

副都統秦布奏稱都城以內向來禁放鳥鎗但歷年



既久又漸致有於城內放鳥鎗者或晝或夜時聞其聲仰請

勅下步軍統領將城內放鳥鎗并非時放爆竹之處永行

禁止

奏入於雍正三年九月十六日奉

旨著步軍統領八旗都統等知道

兵部議覆據副都統多賽奏稱安定門外黃寺前教場係八旗操演兵丁閱看軍器及蒙古往來之地臣

見小人圖利有在路傍掘土為坯市賣者若不行禁止恐至日久不惟掘傷教場亦且有壞道路况地近城垣有關風水伏祈

勅下嚴行禁止等語查得教場委屬緊要之地又係近城風水攸關應如所請嗣後令步軍統領衙門出示曉諭嚴行禁止仍交派出稽察教場旗員該營武弁及兵馬司官員令其不時巡查若仍有在教場處掘土者即行拏送刑部從重治罪將該管官一併議處再

八旗教場俱近城垣不肖人等希圖取利有掘土為  
坯市賣者亦未可定相應一併交與步軍統領衙門

人旗稽察教場官員及五城兵馬司官員嚴行禁止

可也

奏入於雍正二年十月十七日奉

旨依議

世宗憲皇帝諭行旗務奏議卷三